

**TEKS UCAPAN**  
**BRIG. JEN. DATO PROF DR KAMARUDDIN HUSSIN**  
**NAIB CANSOLOR UNIVERSITI MALAYSIA PERLIS**  
**SEMPENA MAJLIS MERAIKAN MEMPELAI**  
**PADA 27 JULAI 2011 DI DEWAN 2020, KANGAR**

Bismillah Hirrahman Nirrahim

Assalamualaikum Warahmatullahi Wabarakatuh Dan Salam Satu Malaysia.

Mengadap Raja Muda Perlis, Duli Yang Teramat Mulia Tuanku Syed Faizuddin Putra Ibnu Tuanku Syed Sirajuddin Jamalullail, merangkap Tuanku Canselor UniMAP

dan Raja Puan Muda Perlis Duli Yang Teramat Mulia Tuanku Hajjah Lailatul Shahreen Akashah Khalil, merangkap Pro-Canselor UniMAP.

Ampun Tuanku, Sembah Patik Mohon Diampun,

Patik dan seluruh warga Universiti Malaysia Perlis merafak sembah, menjunjung kasih yang tidak terhingga, di atas perkenan Duli Tuanku berdua bercemar Duli berangkat hadir ke Majlis Meraikan Mempelai yang julung kali dianjurkan ini.

Sesungguhnya, komitmen Dulu Tuanku berdua dalam aktiviti-aktiviti yang dianjurkan oleh UniMAP amat patik sekalian hargai.

Ampun Tuanku,

Izini patik menyampaikan ucapan kepada barisan tetamu yang dimuliakan.

Yang Berbahagia Dato' Prof. Dr. Aziz Bin Deraman,  
Naib Canselor Universiti Malaysia Terengganu

Yang berbahagia, Prof. Dr. Zul Azhar Bin Zahid Jamal,  
Timbalan Naib Canselor Akademik & Antarabangsa

Yang Berbahagia Prof. Dr. Ismail Bin Daut,  
Timbalan Naib Canselor Penyelidikan & Inovasi

En. Zuber Bin Haji Mohamad  
Timbalan Pendaftar

Pn. Saodah Binti Hassan  
Bendahari

Pn. Mazmin Binti Md Akhir

Pustakawan kanan

Penolong-penolong Naib Canselor

Dekan-dekan dan Ketua-ketua Jabatan, Wakil-wakil Media yang Dihormati, Warga kerja dan para hadirin yang dikasihi sekalian.

Good Evening, Wan Shang Hao, Maalai Vaanakkam, Ma Sa An Khair, Sawadi Kharp

**Melati kuntum tumbuh melata,  
Sayang merbah di pohon cemara;  
Assalammualaikum mulanya kata,  
Saya sembah pembuka bicara.**

Alhamdulillah, yang memanjangkan usia serta memberikan kesihatan yang baik buat kita semua hingga membolehkan kita berhimpun dalam majlis meraikan mempelai Universiti Malaysia Perlis pada malam ini.

Terlebih dahulu, izinkan saya, selaku Naib Canselor Universiti Malaysia Perlis, mewakili diri saya dan seluruh warga UniMAP, mengambil kesempatan ini mengucapkan selamat

datang kepada tuan-tuan dan puan-puan sekalian, *Ahlan wa-Sahlan wa-Marhaban Bikum.*

Jutaan terima kasih, syabas dan tahniah juga dititipkan diucapkan kepada ahli jawatankuasa yang memastikan majlis ini menjadi realiti meskipun dalam tempoh waktu yang agak singkat. Pengorbanan dan usaha gigih anda semua amat saya hargai.

Hadirin dan hadirat sekalian,

Untuk makluman semua, majlis meraikan mempelai ini merupakan program julung kali yang dianjurkan oleh UniMAP melalui Kelab Kakitangan khusus untuk meraikan 50 kakitangan UniMAP yang telah melangsungkan perkahwinan bermula bulan November 2010 yang lalu sehingga bulan ini.

Ramai yang melayangkan jemputan perkahwinan, namun atas kesibukan saya sebagai Naib Canselor juga kekangan waktu DYTEM Canselor dan Pro Canselor, tidak semua majlis dapat kami hadiri.

Justeru, penganjuran majlis ini adalah sebagai satu tanda penghargaan kami buat warga UniMAP yang kini melalui fasa baru dalam kehidupan. Semoga ianya akan menjadi satu kenangan yang terindah buat semua.

Hadirin dan hadirat sekalian,

Perkahwinan merupakan satu ikatan suci yang menghubungkan dua hati. Perkahwinan merupakan kombinasi cinta, perasaan, keinginan dan tanggungjawab. Justeru, sewajarnya ikatan ini dijaga dengan sebaik mungkin kerana ianya juga merupakan amanah dari Allah SWT.

Tidak dinafikan, pelbagai rintangan dan dugaan akan menjadi rencah dalam sesebuah perhubungan, namun sebagai seorang yang telah berpengalaman, suka saya menasihati kesemua mempelai dan juga warga UniMAP yang hadir untuk mengamalkan sifat sabar dan toleransi dalam perhubungan.

Seperti bait lagu Allahyarham Tan Sri P. Ramlee “Sedangkan lidah lagi tergigit inikan pula, suami isteri, buang yang keruh ambil yang jernih baru teguh peribadi....Apa guna kita bertengkar, suami isteri harus bersabar”.

Ingatlah bahawa perkahwinan adalah merupakan tanggungjawab, peliharalah rumahtangga dengan penuh kasih sayang. Jadikan rumahtangga kita sebagai jambatan untuk ke syurga. Andaikata suami dan isteri bijak mengurus rumahtangga serta disulami dengan rasa penuh tanggungjawab yang sebenarnya, rumahtangga merupakan

"Syurga" dunia yang tidak ada tolok bandingnya namun ia akan bertukar menjadi "neraka" sekiranya rukun rumahtangga tidak dipatuhi.

Kepada suami, sayangilah isterimu sepenuh hati dan jiwa kerana Allah, dan kepada isteri, sayangilah suamimu dengan sepenuh hati dan redha. Terimalah seadanya. Jangan jalani kehidupan diluar kemampuan. Jagalah amanah kasih sayang di antara kamu berdua. Jangan sekali-kali kepercayaan dan kasih sayang itu dinodai. Silap langkah, salah perhitungan, keinginan yang melampau serta melangkau kemampuan yang wujud, nescaya cahaya rumahtangga yang terang benderang akan bertukar menjadi gelap gelita yang tidak akan seterang cahaya pada mula-mula ia dibina sekiranya ia dibina semula.

Akhir kata, semoga kalian hidup dengan penuh kasih sayang dan diberkati Allah SWT. Amin.

Ampun Tuanku,

Sekian sahaja ucapan patik. Akhir kata sekali lagi patik ingin merafak sembah, menjujung kasih yang tidak terhingga kepada Duli Tuanku berdua di atas perkenan berangkat ke majlis pada malam ini. Sesungguhnya kehadiran Duli Tuanku berdua begitu besar ertinya buat patik sekalian.

Patik sudahi dengan Wabillahitaufik Walhidayah  
Wassalamualaikum Warahmatullahi Wabarakatuh.